

www.BibleForChildren.org

मत्ती 26



फसह गै
त्युंहार ऊं छ
दिन पेलां यीसू
बैतनिय्याह गाम ऊं
चाल पड़यो। बठै लाजर
रेवंतो हो झिकै नै यीसू
मरेडा मू जीवंतो करयो हो।
जद मरियम जटामांसी ऊं
बणाएडी आदै किलै गी
भोत मेंगी सेंट यीसू गै
पगां पर लगायो अर आपगै
बाळा ऊं बिंगा पग पूंछया जद बिं
सेंट गी सुरम सारै घर में होगी।




जद यहूदा इस्करियोति झिको बिंगै बारा चेला मू एक हो।
प्रधान याजक गै कनै यीसू नै धोखै ऊं पकड़वाण खातर गेयो।
बे बिंगी बात सुणगे भोत राजी होया
अर बां बिनै धन देण गो बचन
दियो। ईखातर फेर यहूदा यीसू
नै धोखो देगे पकड़वाण गी
ताक में रेण लागग्यो।



चेलं यीसू गी बात मानी अर फसह गी
रोटी बठै तैयार करी। जद बे खाण गै
टेम बेठया तो यीसू रोटी ली अर आसिस
मांगगे तोड़ी अर चेलं नै देगे केयो खाओ
ओ मेरो सरीर है। फेर बण लोटै में
दाखरस लियो अर धन्यवाद करयो अर
बानै देगे केयो, थे सारा इमूं पीओ। ओ
दाखरस मेरै लोड़ गै वायदै नै याद करावै।
ओ वायदो परमेसर अर लोगं
गै बीच में है। अर
झिको भोत सारां
गै पापां गी माफी
खातर बहायो
जावैगो।



फेर यीसू बोल्यो, “समौन, हे समौन। जिंया किसान कणक नै साफ करै है इंया ही थारै सारा गी परीक्सा लेण गी सैतान आग्या परमेसर ऊं मांगी है। पण में तैरै खातर पराथना करी है कै तेरो बिस्वास ना जांतो रेवै अर जद तूं पाछो आवै तो आं भाईयां गो ई बिस्वास तकड़ो करी।” समौन केयो, “हे प्रभु, में थारै सागै जेळ तो के मरण नै बी तैयार हूं।” बण केयो, “हे पतरस, आज कुकड़ गै बांग देण ऊं पेलां तूं मेरो तीन बार ओ केगे इनकार करैगो कै में इनै कोनी जाणूं।”



जद यीसू आपगै चेलां गै
सागै गतसमनै नाम गी
एक जिग्यां में आयो अर
चेला नै केयो, “थे अठै
बेठया रेओ। मैं जा'गे
पराथना करूं।” फेर बण
केयो, “हे पिता,” तेरै खातर
सारो कीं सोरो है। ईं कटोरै
नै मेरै कनूं दूर कर फेर
झिको कीं मैं चाऊं हूं बो
कोनी पण झिको कीं थे
चावो हो बो पूरो होवै।




जद यहूदा रोमी सिपाहियां गी टुकड़ी अर महा याजकां अर फरीसियां गी ओर ऊं भेजेडा मिन्दर गै पहरेदारां नै लेगे लालटेण अर संसारी मसालां अर हथियार नै लेगे बठै आयो। जद एक चेलै यीसू गै बोलण ऊं पेलां ई मुख्य याजक गै दास गो तलवार ऊं सजो कान उडा दियो। ईं पर यीसू केयो, “बस भोत हो'गी कोई हद'ई होवै।” अर बिंगो कान हात लगागे पाछो जोड दियो।



फेर बे बिनै पकड़गे मुख्य याजक गै घरे लिआया अर पतरस
दूर दूर ई बांगै लारै-लारै आण लागरयो। जद बे आंगणै में
आग जगा गे सारा भेळा
बैठयो तो पतरस बी बांगै
बिचाळै जा बैठयो।




महा याजक गै एक
सेवक झिको बिं आदमी
गो रिस्तेदार हो झिकैगो
कान पतरस बाडयो हो
बिनै पूछयो, “बता मै
तनै बिंगै सागै बाग मै
कोनी देख्यो हो?” पतरस
फेर इनकार कर दियो
अर बिं टेम कुकड़ बांग
दे दी। फेर पतरस बारै
आ'गे फूट फूट'गे भोत
ई रोयो।



जद सगळी पंचायत बानै राजा पिलातुस
कनै लेगी। जद राजा पिलातुस बिनै
पूछयो, “तूं यहुदी लोगां गो राजा है के?”
बण जबाब दियो, “तूं आप ई तो बताण
लागरयो है।” पण पिलातुस
यीसू नै छोडण गी इच्छा
ऊं लोगां नै ओर समझाया।
पण सारा लोग रोळो मचाण
लागया कै इनै करूस पर
चढाओ, करूस पर चढाओ।




जद पिलातुस बिनै करूस पर चढाण खातर
बांगै हात में दे दियो। जद सिपाईयां यीसू नै
आपगै कब्जै में ले लियो। अर यीसू आपगो
करूस चक'गे यरुसलेम सैहर ऊं बारै एक
जिग्यां में लेग्यो। बिं जिग्यां गो नाम
“खोपड़ी गी जिग्यां” हो अर इब्रानी बोली में
इनै गुलगुता केयो जावै है।



बठै बां बिनै अर बिंगै सागै दो ओर
आदमियां नै करूस पर चढाया। बे दोनूं
आदमी आसै पासै अर बिचाळै यीसू नै।



अर सूरज दिखणो बंद हो'ग्यो। अर मिन्दर गो पड़दो बिचाळ् पाटग्यो। यरुसलेम मिन्दर गो पड़दो बिचाळ् पाटग्यो अर यीसू जोर ऊं बोल्यो, “हे पिता परमेसर, मैं मेरी आत्मा थारै हात में सोपूं।” अर इया केताई प्राण छोड़ दिया।



जद आथण होगी अर क्यूंकै सब्त गो
दिन हो। ईखातर अरिमतिया गो युसुफ
आयो। बो यहूदी महासभा गो
मानेड़ो आदमी हो अर परमेसर
गै राज गै आण गी अडीक
करतो हो। हिम्मत गै
सागै बो पिलातुस गै
कनै आयो अर बण
यीसू गी ल्हास
मांगी।

जद बण एक मलमल
गी चादर खरीदी। अर
ल्हास नै उतारगे
बिमै पळेट दी अर
जा'गे बणाएड़ी कबर
में रख दी। अर कबर
नै एक मोटै पथर ऊं
बंद कर दी।



दूसरै दिन झिको सबत गो दिन हो, मुख्य
याजक अर फरीसी पिलातुस कनै भेळा
होया अर केयो, हे महाराजा,
म्हानै याद है कै बो भटकाण
आळो जद जीवंतो हो बण
केयो में तीन दिनां गै
बाद जीवंतो हो जाऊंगा।

अर बे रुखाळी करण
आळा नै आपगै सागै
लेग्या अर

पथर पर
निसानी
लगागै कबर
गी रुखाळी
करी।



सब्त गै बाद जद दीतवार गै दिन दिनगै
दिनगै मरियम मगदलीनी अर दूसरी
लुगाई मरियम कबर संभालण
आई। जद सुरग ऊं प्रभु गो
एक सुरगदूत बठै आयो हो।
जद बिं टेम एक मोटो
भुचाळ आयो। सुरगदूत
आ'गे बो पथर हटागे
बिं पर बेठग्यो।

ओ देखगे कबर
पर पेरो देण आळा
सिपाई डरगे कांपण
लागग्या। अर इया
हो'ग्या जिंया बे
मरेडा होवै।



जद सुरगदूत बां लुगाईयां नै केयो, “डरो
ना। मनै ठा है थे यीसू नै दूंडण लागरी
हो। झिकै नै करूस पर चढायो।
बो अठै कोनी। जिया बण
केयो, बो मरण गै बाद
पाछो जीवंतो हो'ग्यो।
आज्यो, बिं जिग्यां
नै देखो, जठै बिनै
सुणायेडो हो।”



बे लुगाईयां जद ई कबर नै छोड़गे
खुसी ऊं भरगी। अर आ बात यीसू गै
चेला नै सुणाण भाज पड़ी। एकदम
यीसू बानै मिल्यो अर बोल्यो, “थानै
सांती मिलती रेवै,” अर बां बिंगै
पगां पड़गे बिंगी आराधना करी।



बाद में जद बिंगा ग्यारा चेला भोजन करै हा, बो बांगै सामणै प्रकट होयो अर बां बिंगै अबिस्वास अर मन गी कठोरता गै खातर बानै झिड़क्या क्यूंकै बां बिंगो बिस्वास कोनी करयो हो झिको जीवंतो होण गै बाद बानै दिख्यो हो।

ई तरियां जद प्रभु यीसू बाऊं बात कर चुक्यो हो तो सुरग में उठा लियो गेयो बो परमेसर गै दाहिणी ओर बेठयो है।



क्यूँकै परमेसर संसार गै लोगां सागै इतो
प्रेम करयो कै आपगो एकलोतो बेटो दे
दियो कै झिको कोई बी बिं पर
बिस्वास करै बो नास ना होवै पण
अनन्त जीवन पावै।



रोमी 3:23 ईंखातर सारा लोग पाप करयो अर परमेसर
गै सागै झिकी मेमा ही बा अब कोनी।

रोमी 6:23 क्यूंकै पाप गो इनाम मोत है पण झिको
इनाम परमेसर देवै है बो आपणै प्रभु यीसू मसी में
अनन्त जीवन है।

इब्रानी 9:27 जिंया मिनख गै मरण गो दिन बणेड़ो है,
बियाई बिंगै न्याय गो बी दिन बणेड़ो है।

इफिसुस 2:8,9 क्यूंकै परमेसर गी किरपा गै द्वारा थारै
बिस्वास गै कारण थानै मुकती मिलै। ओ परमेसर गो
वरदान है पण थारै कानी ऊं कोनी।

ओ सारो आपणै करमा गो फळ कोनी है, इंया ना होवै
कै आपां कीं बात पर घमण्ड कर सकां।



रोमी 10:9,10 कै जे थे आपगै मूं ऊं केवो कै यीसू ई प्रभु है अर आपगै मन में हिसो बिस्वास राखो हो कै परमेसर बिनै मरेडा मूं जीवंतो करयो तो थानै जरूर मुकती मिल ज्यैगी। क्यूंकै थे आपगै मन में हिसो बिस्वास राखो हो ईखातर परमेसर गी नजर में निरदोस बणो हो अर थे आपगै मूं ऊं केवो कै यीसू ई प्रभु है ईखातर परमेसर थानै मुकती देवै है।

यूहना 3:16,17 क्यूंकै परमेसर संसार गै लोगां सागै इतो प्रेम करयो कै आपगो एकलोतो बेटो दे दियो कै झिको कोई बी बिं पर बिस्वास करै बो नास ना होवै पण अनन्त जीवन पावै। परमेसर आपगै बेटै नै संसार गै लोगां नै सजा देण खातर कोनी भेज्यो पण बिंगै द्वारा संसार गै लोगां नै मुकती मिलज्यै ईखातर भेज्यो।



1 यूहन्ना 5:11-13 अर बा गवाई आ है: परमेसर
आपां नै अनन्त जीवन दियो है अर बो जीवन
बिंगे बेटे यीसू गे द्वारा मिल्यो है। झिको बिंगे बेटे
नै मानै है, बिंगे कनै अनन्त जीवन है। पण
झिको परमेसर गे बेटे नै कोनी मानै है, बो
परमेसर गे सागै अनन्त जीवन कोनी जी सकै है।
परमेसर में बिस्वास राखण आळो, थानै ऐ बातां
ईखातर लिखण लागरयो हूं झिकै ऊं थे ओ
जाणल्यो कै अनन्त जीवन थारो है।



मत्ती 26-28; लूका 22-24; यूहन्ना 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Bagri Bible (bgq) © 2023 (Active), Wycliffe Bible
Translators, Inc. All rights reserved.
© WIn Publishing Trust

<http://www.wycliffe.org>

©2024 Bible for Children, Inc.

www.M1914.org

www.bibleforchildren.org

